

5355/3862b(4)
c.2

范石湖詩集

李正華
題檢



Blank page with faint vertical lines and ghosting of text from the reverse side.

Blank page with a light brown or tan color.

石湖居士詩集卷十三

與吳興薛士隆使君遊弁山石林先生故居

此卷乾道壬辰冬赴廣西道中所作舊名

南征小集

白蘋有嘉招蒼弁得勝踐會心不憚遠乘興恐失便籃輿犯窮臘共作忍
寒面溟濛雲釀雪浩蕩風落鴈松篁漸清幽猿鶴或悲怨英英文章公作
舍鎖葱蒨嶢峰俯前榮佳木秀諸院窮搜發山骨林立侍談讌西巖踞熊
虎東巖峙屏案履綦故彷彿葢及已零亂經營三十年成毀一飛電摩挲
土花碧小立為三歎

自石林回過小玲瓏巖竇益奇昔為富人吳氏所有今一子尚幼

山檢校於官

一丘乃中虛洞穴四無礙却略巖岫杳黝糾石狀怪蒼牛飲前池碧鱗灑
微瀨雕鏤具百巧圖畫窘千態哀湍寫壞磴凍雨濕空翠踈梅照草棘瘦
竹拔蹊隧當時閭閻子目力在塵外孤童藐難料奇事疑有待誰歟千金
捐來換把茅蓋不仙亦足豪眾垤皆累塊我評北山遊勝絕此無對玲瓏

詎可小孰能爲之大

濯纓亭在吳興南門外

淒風急雨脫然晴當道橫山似見迎野水茫茫何用許爛供遊子濯塵纓
乾道己丑守括被召再過釣臺自和十年前小詩刻之柱間後五
年自西掖帥桂林癸巳元日雪晴復過之再用舊韻三絕

浮生渺渺但飛埃問訊星宮又獨來天上人間最高處爲君題作鬱蕭臺
拙疎何計補涓埃慚愧雙旌去復來三過溪門今老矣病無脚力更登臺
界天山雪淨黃埃溪上扁舟夜汎來匝地東風勸椒酒山頭今日是春臺

玉山道中

常山多清溪玉山富喬木行色鬱蒼然頗亦慰愁目梅花隔籬見瓏璵照
茅屋晚來風刮地想見飄香玉

桃花壇下望龜峰

石壇無土謾嶽岑何自能生小柏林擬擘蛤蜊龜殼上病來不殺嬾登臨
清音堂與趙德莊太常小飲在餘干琵琶洲傍洲以形似得名

曲浦彎環繞縣青一盃間客兩飄零琵琶不語蒼煙暮山水清音著意聽

過鄱陽湖次游子韻

春工釀雪無端密大塊囊風不肯收休問巉巖與欹側我今年靡共波流
野鷹兀兀平沙上折葦蕭蕭古渡頭滿眼荒寒底處所令人腸斷五湖舟
豫章南浦亭泊舟二首

繡檻臨滄渚牙檣插暮沙浦雲沉斷鴈江雨入昏鴉野曠天何近春寒歲
未華來朝風一席隨處且浮家

閏歲花光晚霜朝草色荒趁墟猶市井收潦再耕桑客路東西懶江流日
夜忙長歌情不盡一酌醉滄浪

清江道中橘園甚夥

芳林不斷清江曲倒影入江江水綠未論萬戶比封君瓦屋人家衣食足
暑風汎花蘭芷香秋日籬落明青黃客舟來遲佳景盡但見碧樹愁春霜
清江臺在臨江郡圍西岡上張安國題榜

南來富壽岡形勝此蟠結岑嶺戴高臺欄檻了風月蕭灘曳長煙閣阜炯

殘雪江流當帶橫練練浮木末天風來無鄉萬里吹醉纈登臨信竒事忍
凍亦癡絕故人春夢覺遺墨秋蛇掣浮雲真可哈揮解酹空闊

自冬徂春道中多雨至臨江宜春之間特甚遂作苦語

客行無晴時泔泔如漏天東吳至西江舊歲接新年蠟屐驚踵決油衣笑
鶉懸掀淖起復什頃步如重關略似鴨與猪汨沒泥水闌我塗未渠窮一
晴愧天慳倒塔橋已斷壁破渡無船路人相告語未到先長歎薄晚得磧
确稍入袁州山不辭石齧足聊免泥沒鞵自古行路吟聽者凋朱顏軒渠
尚能賦詩人類癡頑

玉虛觀去宜春二十五里許君上斗時飛白茅數葉以賜王長史
王以宅爲觀觀旁至今有仙茅極異常草備五味尤辛辣云久食
可仙道士煮湯以設客

白雲堆裏白茅飛香味芳平勝五芝揉葉煮泉摩腹去全勝石髓畏風吹
入分宜

新喻渡無橋分宜橋有欄孰歟兩徼吏賢否已判然堂上著威信四郊如

目前入國政可知茲焉略闕觀

方竹杖

竹君箇箇面團團此士剛方獨凜然外貌中心俱壁立任從癡子削教圓
游仰山謁小釋迦塔訪孚惠二王遺蹟贈長老混融

堵田溪淵清洄洄梅州問路寒雲堆連空磴道虬尾滑竹輿直上無梯階
蒼官來迎夾道立相逢無言心眼開翠微中斷雪礪吼兩耳不辨供喧阗
林間靜極成斷相政要萬壑號風雷山如蓮盆繞金地龍官避席餘蒼崖
祖師抱膝坐古塔大禪海浪翻天來騰空狡獪我未暇拄杖踏濕撞莓苔
問龍亦借一席地解包聽雨眠西齋當年公案忌錯舉神通佛法同坑埋
混融菴中的的意笑我舌本空崔巍茲事且置飽喫飯稊田米賤如黃埃
大雨宿仰山翌旦驟霽混融云無乃開仰山之雲乎出山道中作

此寄混融

誰開大仰雲此豈吾力及日光千丈毫彈指衆峰立衡山捲陰氣海市發
冬蟄韓蘇兩枯魚出語自濡濕人厄與天窮底用苦封執但喜拄杖俊仍

欣芒屨澁向來三三尺泥有足似羈馬龍淵古橋鉞獺徑寒溜泣龍淵獺徑皆山
中往春淺山容瘦風饕澗聲急一簞寄前村野藪旋收拾猫頭髡筍尖雀
舌剥茶粒土毛冠江西斗酒況可挹聊同一笑粲緩賦百憂集

初入湖南醴陵界

崖樹陰陰夾暝途出山歡喜見平蕪一春客夢飽風雨行盡江南聞鷓鴣

醴陵驛

綠水橋通縣縣前浮橋名門前柳已黃人稀山木壽土瘦水泉香乍脫泥中滑
還嗟堠子長楮州何日到鼓柁上滄浪

湘潭道中詠芳草

積雨倏然晴秀野若新沐芳草徑寸姿中有不勝綠萋萋路傍情頗亦念
幽獨驅馬去不顧斷腸招隱曲

初見山花

三日晴泥尚沒鞞幾將風雨過年華湘東二月春纔到恰有山櫻一樹花

楮洲道中

煙凝山如影雲塞日射毫桃間紅樹迴麥裏綠叢高客子歎游倦田家甘
作勞乘除吾尚可未擬賦離騷

浮湘行

湘山中間湘水橫綠蘋葉齊春漲生盤渦汙汙去無聲吾乘桂舟沂中濡
揚波擊汰雙櫓獰輶轡引竿如牛鳴篙師絕叫疊鼓轟潛魚跳奔乳猿驚
煖煙浮空晝夢騰山長水遠天無情吹簫拊瑟弔湘靈水妃風御續來迎
問客良苦遠征行昨者斧鉞下青冥命我盡護安南兵嶺海一視如王庭
布蕩陽春濯腐腥王事靡盬來有程匪躬之故惟爾毗芳洲杜若空青青
九歌淒悲不可聽願賡楚調歸和平

湘江洲尾快風挂帆

船頭雪浪吼奔雷十丈高帆滿意開我自只憑忠信力風應不為世情來
兒童屢惜峰巒過將士猶教鼓笛催明日祝融天柱去更煩先捲亂雲堆

泊湘江魚口灘

知時社燕語檣竿游子奔波自鮮歡趁客賣魚雙漿急隔林沽酒小旗寒

瀟湘渾似日南落嶽麓已從天外看薄暮灘前收百丈卧聞三老報平安
謁南嶽

湘中固多山夾岸萬馬屯坡陀無敢高似遜喬嶽尊曉投望雲亭衆丘拱
牆藩濃嵐忽飄蕩積翠浮雲端天柱已峻極祝融更高寒紫蓋鬱當中岡
勢洶崩奔峙為赤帝峰下直宮壩垣角樓捧雙闕圓方模九閭炎符撫中
興南正實司天草木薰協氣山林奠神姦安靈有備物龍卷鸞旗軒走忝
桂林伯與神俱南轅上謁禮亦宜為國憂元元心空禍福相古井寒無瀾
杯琰不用擲但願歸田園相傳壁畫好拂拭塵埃昏弓刀立壯士劔珮班
靈官後宮行樂處窈窕千雲鬟錦地舞月晝珠櫳侍春閑武氏筆已絕梗
概猶清妍後宮壁畫武洞清筆極禁籙富貴之趣紹興二十旋車闔廟去
頗厭山市喧勝果招客遊徑排集賢關梵皮絢雜組衡嶽藏經皆錦絲竹
乃其戶部侍郎彬所造錫杖鏘古鑲開山善果尊者所遺避雨勝業閣在嶽祠之南晚晴留凭欄石
廩映岫巉望眼增孱顏上封眇孤絕南臺半雲煙碧岫有靈藥朱陵巢洞
仙晚晴乃盡見諸峰病倦懶幽討山僧鑄我頑松膠唐季枝柏跼隋初根奇事不

勝紀重遊當細論

廟路三十里夾岸大松五季時馬氏所植勝業寺柏不見根偃於地出八榦龍蟠占數畝世所未之見傳為隋

物時

兩蟲

鷓鴣憂兄行不得杜宇勸客不如歸天涯羈思難繪畫惟有兩蟲相發揮

衡陽道中二絕

桑下蕪菁晚高花出短籬茅簷少春事惟記浴蠶時
黑殺鑽籬破花猪突戶開空山竹瓦屋猶有燕飛來

衡州石鼓書院

古磴浮滄渚新巒鎖碧蘿要津山獨立巨壑水同波俎豆彌文肅衣冠盛
事多地靈鍾傑俊寧但拾儒科

合江亭并序

合江亭即石鼓書院今為衡州學宮一峰特立踞兩水之會湘水自右蒸
水自左俱至亭下合為一江而東有感而賦韓文公所謂淥淨不可唾
者即此處今有淥淨閣

石鼓鬱嵯峨截然踞滄洲有如古盟主勤王會諸侯蒸湘伯叔國稟命會
葵丘敢不承載書戮力朝宗周混爲同軌去崩奔不敢留宜哉百谷王博
大無與儔擅毳昔亂華車馬隔中州未聞齊晉勲包茅費誅求威文亦弘
規尚取童子羞安知千載後但泣新亭囚我題石鼓詩願言續春秋

沈家店道傍棣棠花

乍晴芳草競懷新誰種幽花隔路塵綠地縷金羅結帶爲誰開放可憐春
邵陽口路麤惡積雨餘濘難行

平生春夢境俛仰撫八極湖南天盡頭夢亦未常識豈知多病身今乃著
脚歷山泉澄不清崖土豐而赤坳堂滑勝油累塊硬逾石貪夫一回顧壯
士三歎息不知清淑氣果復曾鬱積我豈鄙夷之短咏聊一劇

馬鞍驛飯罷縱步

食飽倦輿馬散策步前岡意行踏芳草蕭艾菊生香春事甚寂寥山桃帶
松篁游蜂入菜花此豈堪蜜房今年蠶出遲柘葉分寸長好晴纔數日歲
事未渠央

黃巖嶺

薄遊每違已茲行遂登危峻阪盪胸立恍若對鏡窺傳呼半空響濛濛上
煙霏木末見前驅可望不可追躋攀百千盤有頃身及之白雲叵攬擷但
覺沾人衣高木傲燒痕蔥蘢茁新萐春禽斷不到惟有蜀魄啼謂非人所
寰居然見鋤犁山農如木客上下翔以飛寧知有康莊生死安嶮巖室屋
了無處恐尚槽巢栖安得拔汝出王路方清夷

衡永之間山路艱澁薄晚吏卒闕云漸近祁陽路已平夷皆有津
津之色

朝登赤土嶺暮入黃泥谷春江弄花月歸夢恍在目覺來行路難杜宇叫
高木凹中泥沒踝凸處石齧足坐輿我尚病想見肩輿僕衡陽復祁陽可
暫不可宿晚來出前岡路坦亭埃促將士走相賀喜色如膏沐人生本無
悶逆境要先熟不從憂患來安識平爲福夷塗不常遇歷險始知足

書浯溪中興碑後

并序

乾道癸巳春三月余自西掖出守桂林九日渡湘江游浯溪摩挲中興

石刻洎唐元和至今遊客所題竊謂四詩各有定體頌者美盛德之形容以其成功告於神明者也商周魯之遺篇可以槩見今元子乃以魯史筆法婉辭含譏蓋之而章後來詞人復發明呈露之則夫磨崖之碑乃一罪案何頌之有竊以爲未安題五十六字刻之石傍與來者共商略之此詩之出必有相詬病者謂不合題破次山碑此亦習俗固陋不能越拘牽之見耳余義正詞直不暇卹也

三頌遺音和者希丰容寧有刺譏辭絕憐元子春秋法都寓唐家清廟詩歌詠當諧琴搏拊策書自管璧瑕疵紛紛健筆剛題破從此磨崖不是碑

愚溪在零陵城對岸渡江即至溪甚狹一石澗耳蓋衆山之水流出湘中

一水彎環羅帶闊千古零陵擅風月取名如許安得愚因病成妍却奇絕至今鏡淨不可唾猶恐先生遺翰墨澤及溪流不底身付與後來商巧拙我欲扁舟窮石澗春漲未生寒瀨咽紛紅駭綠四山空惟有風篁韻騷屑清溪東去客西征鈿鈿潭邊聊駐節何時隨汝下瀟湘歸路三千櫓伊軋

鈿鈿潭形似之

宿清湘城外田家

驅馬力猶彊
奏牀身始疲
浮浮雲拂帳
滴滴水鳴籬
未熟燈前夢
閑尋道上詩
湘中多夜雨
客枕最先知

宿深溪驛去廣右界只一程

北戶書頻到
南雲鴈不飛
試評騎馬路
何似釣魚磯
擊柝黃茅店
篝燈白竹扉
故園桑柘煖
亦有稻梁肥

石湖居士詩集卷十四

晚春二首

以下桂林作
舊在乙稿

靜極聞檐珮慵來愛枕幃隙虹飛永晝簾影碎斜暉燕踏花枝語蜂紫柳絮歸輕颺宜白紵時節近清微

好事憐春老無愁耐日長爐煙驚扇影酒面舞花光照水雲容嬾移牀竹意涼更煩紅槿帽促拍打山香

紅荳蔻花

綠葉蕉心展紅苞竹籜披貫珠垂寶珞剪綵倒鸞枝且入花欄品休論藥裏宜南方草木狀為爾首題詩

偶題

檐雨初乾團扇風夕陽芳樹綠葱葱蕉心榴萼俱無賴要與春衫相並紅
次韻郭季勇機宜雪觀席上留別

勝絕尊前萬事休縱非吾土且登樓山迎雨脚俄飛過風約江聲欲倒流野水漸堪添酒面夕陽依舊滿簾鈎憑闌從此遲歸鞅能及中秋對月不

次韻許季韶通判雪觀席上

把酒臨風瑞露傾瓊漿何用謁雲英捲簾雨脚銀絲挂倚杖江頭綠漲生
嶺海一涼蘇暑病山林千籟試秋聲茲遊竒絕忘羈宦慚愧煙中短棹橫
送周直夫教授歸永嘉

青燈相對話儒酸老去羈遊自鮮歡昨夜榕溪三寸雨今朝桂嶺十分寒
知心海內向來少解手天涯良獨難一笑不須論聚散少焉吾亦跨歸鞍

贈趙廉州

馬羣雜沓草蒙茸刮目權竒一洗空天末也煩行李到歲寒聊得酒尊同
梅花夜夜湘南雨榕葉年年海北風少待佳晴看山去玉筍高插翠雲叢
去年過弋陽訪趙恂道通判話西湖舊遊因題小詩近忽刻石寄

來謾錄

紅塵寶馬碧湖船一夢如今費十年却照清溪尋綠鬢但餘衰雪兩蕭然
送唐彥博宰安豐兼寄呈淮西帥趙渭師郎中

唐子皦自鮮水清石粼粼繡腸五車書不鄙簿領塵黔山與桂嶺一笑二

十春天涯會面難歲晚情話真五管無賢侯但有嵐煙昏此豈功名場往
戍清淮濱北門詩書帥平生吾故人問訊今何如凌煙上星辰爲言落南
客病作寒蟿呻飄飄北歸夢夜繞吳淞雲

燕堂後盧橘一株冬前先開極香

盧橘花殘細細飛滿枝晴日鬧蜂兒霜餘有此香無奈合與稱題賦小詩
乾道癸巳臘後二日桂林大雪尺餘郡人云前此未省見也郭季
勇機宜賦古風爲賀次其韻

憶昔北征秋遇雪穹廬苦寒不堪說飛花如席暗燕然把酒悲歌度佳節
胡兒館客類西河鏑戶不容浮蟻泄當時已分餐羶葶寧復夢遊炎嶺熱
忽逐梅花行萬里又與故山輕話別天公恐我愁瘴霧十日號風吹石裂
同雲乃肯度嚴關一夜玉峰高巖嶮老榕翁密最先縞穉竹枵虛時一折
須知桂海接蓬瀛滿目三山白銀闕不管樓高翠袖單但嫌酒淺金杯凸
東郭先生履雖敝詩情却鬪冰壺潔歸撚凍髭搜好句山館青燈對明滅
爲憐叶氣到黃茅何止森森松柏悅豐年作守會飽煖羈宦思歸自愁絕

豈無菊徑樂琴書亦有秫田供麴蘗東岡雪後一犁春誰在陂頭憶調燮
次韻陳仲思經屬西峰觀雪

仙人灘江遊剪水馮夷宮賓友來鄒枚寒轡搖冬瓏起望天南陲玉沙滿
長風越人未省識把酒酌層空從來嶠南北人謂將無同那知梁園霰飛
入瑞露中幕府有清士尋僧上西峰六花信娟巧未及五字工我亦滌冰
硯課虛貴新功莫嗟兩臞儒毫端尚清豐

○喜雪示桂人

臘雪同雲嶺外稀南人北客盡冬衣從今老杜詩猶信梅片飛時雪也飛
寄題商華叔心遠堂用卷中韻

示我新詩卷知君遜俗情安流視巫峽灰劫笑昆明微外夜絃語夔頭春
蟻生藍橋即仙窟何況有雲英

送郭季勇同年歸衡山

天壤郭有道文獻今在茲啄啄家雞羣見子野鶴姿塵籠萬里心擇食中
夜飢拙宦避捷徑瘴風吹鬢絲平生杏園友把酒天南陲何敢吏朱浮但

喜見紫芝問君今何適舊圃餘荒畦提攜漢陰甕歲晚俱忘機勿開衡山
雲恐驚隱淪棲定肯從君遊歲晚攀桂枝我亦理吳榜春湘綠蘋齊風蒲
爲誰落之子同襟期丁寧祝融峰將迎兩枯藜一望五千里共洗蠻煙悲
甲午歲朝寓桂林記去年是日泊桐江謁嚴子陵祠迺度嶺感

懷賦詩

去年曉纜解江臯也把屠蘇泛濁醪一席飽風漁浦闊千山封雪釣臺高
將軍老矣鳴孤劔客子歸哉咏大刀早晚扁舟尋舊路柁樓吹笛破雲濤
癸水亭落成示坐客長老之記曰癸水繞東城永不見刀兵余作
亭於水上其詳具記中

天將福地鞏嚴城形勝山川表裏明舊說桂林無瘴氣今知灘水辟刀兵
雲深銅柱邊聲樂月冷珠池海面平願挽江流接河漢爲君直北洗欃槍
緩帶軒獨坐

午日烘開荳蔻苞檐塵飛動雀爭巢蒙蒙困眼無安處閒送爐煙到竹梢
食罷書字

甲子霖涔雨東南濕蟄風荔枝梅子綠荳蔻杏花紅捫腹蠻茶快扶頭老
酒中荒隅經歲客土俗漸相通蠻茶出修仁大治頭風老酒數年酒南人珍之

次韻平江韓子師侍郎見寄三首

自古四愁湘水深誰將城郭啓山林有情碧嶂團欒繞無數朱樓縹緲臨
蚌鼓揭天驚客坐象蓋航海厭蠻琛三千客路長安遠故舊書來直萬金

南人以蚌蛇皮作腰鼓響徹異
常交趾以象革為兜鍪皆異事

靈泉杖屨浙江頭經濟長懷尚典州堂上讀書朝氣爽臺前呼月海光浮
交情尺素勤雙鯉筆力枯松挽萬牛已把三章翻樂府為君擊節變蠻謳

子師新作小築於浙江號靈
泉讀書堂呼月臺皆其處也

前年衝雪過雙溪風帽泥羈騎吹隨爛醉依前逢錦瑟好音惟是欠黃鸝
功名未試玉璜玦離別頻傾金屈卮疇昔北征煩吉夢南征合有夢歸時

項年北使時朝野多妄傳被留不歸子師家中人忽夢予歸翌日
過界報到故末句及之鶯鶯子師家善歌者前年過發券滿已去

宜齋雨中

秀麥一番冷送梅三日霖綠肥新荔子紅浥舊蕉心映竹千絲舞垂檐一

線對終朝盤膝坐卑濕恐相侵

次韻許季韶通判水鄉席上

青山綠浦竹間明彷彿苕溪好處行解慍風來如故舊催詩雨作要將迎
休兵幕府烏鳶樂熟稻邊城鼓笛聲摹寫箇中須綵筆句成仍挾水雲清
水鄉酌別但能之主管能之將過石康

南郭河橋市井喧綠荷香處有江天一簾梅雨爐煙外三疊陽關燭淚前
馬耳西風君並海船頭北渚我歸田後期只恐參商似且醉金槽四十絃

六月十五日夜汎西湖風月温麗

暮機金龜潭追隨今夕涼波紋挾月影搖蕩舞船窓夜久四山高松桂黯
以蒼長煙界巖腹浮空餘劔鋸棹夫三弄笛跳魚翻素光我亦醉夢驚解
纓濯滄浪多情芙蓉風嫋嫋吹鬢霜會心有奇賞天涯此何方清潤不立
塵空明滿生香過清難久留俛俯墮渺茫

燕堂書事

歲稔齋鈴閒年深屋墜推狸爭雷瓦過螳化雨窓來盡日風常籟無時地

不梅耳邊情話少笑口若為開

酒邊二絕

團扇香中嫋嫋風斷腸聲裏看羞紅不須過處催乾盞聽徹歌頭盞自空
日長繡倦酒紅潮閒束羅巾理六么新樣築毬花十八丁寧小玉慢吹簫
枕上作

思歸再用枕上韻

老覺觸事懶病添歸計忙行年心已化疇昔意空長五柳栗里宅百花錦
城莊何時去檢校一棹水雲鄉

李正之提點行至柳用予忙字韻寄和荅

天涯逢我病秋晚送君忙感槩交情厚留連別恨長賓筵猶雪觀客路已
雲莊搖落柳江路應須憶醉鄉

曉出北郊

偏仄深巷中葱蘢綠陰交山家不早起閉戶如藏逃濃露蛻蟬咽小風飢
燕高新渠塵涓流壞陂方怒號遐疇病瘠土不肯昏作勞滅裂復滅裂晚
秧如牛毛空餘朝氣白浮浮濕弓刀官稱勸農使臨風首頻搔

甘雨應祈三絕

晚稻成苞未肯肥鵲鳩啼曉雨來時黃紬被冷初眠覺先向芭蕉葉上知
數日雖蒙霖霖霑塵終恨太廉纖今朝健起巡檐看恰似廬山看水簾
高田一雨免飛埃上水網船亦可催說與東江津吏道打量今晚漲痕來
與鄭少融趙養民二使者訪古訾家洲歸憩松關二君欲助力興
廢戲書此付長老善良以當疏頭

飄飄竹雨潤輕裘嫋嫋松風繫小舟安得從容興廢手越人重上訾家洲
淳熙甲午桂林鹿鳴燕輒賦小詩少見勸駕之意

維南吾國最多儒聳看招招赴隴書竹實秋風辭穴鳳桃花春浪脫淵魚
月宮移種新栽桂江水朝宗舊鑿渠況有狀頭坊井在明年應表第三閭

郡人曹鄴及第詩云我到月宮收得種為君移向故園栽今歲用故事植
桂正夏進德二堂之下又復朝宗古渠以應文章應舉之識趙觀文王世

則亦郡人皆魁天
下故詩中悉及之

逍遙樓席上贈張邦達教授張癸未省闈門生也同年進士俱會樓上者七人

疇昔金門看選賢一星終矣半英躔誰憐蠻府清池句不著南山捷徑鞭
作者七人茅瘴地肅霜九月菊殘天浮生聚散如風雨同倚東樓豈偶然
畫工李友直爲余作冰天桂海二圖冰天畫使北虜渡黃河時桂
海畫游佛子巖道中也戲題

許國無功浪著鞭天教飽識漢山川酒邊蠻舞花低帽夢裏胡笳雪沒韉
收拾桑榆身老矣追隨萍梗意茫然明朝重上歸田奏更放岷江萬里船

耳鳴戲題

歷歷從何起泠泠與耳謀人言衰相現我以妄心求遠磬山房夜寒蛸隴
樹秋圓通無別法但自此根修

○復作耳鳴二首

至音豈寂透希夷珍重幽田爲發揮妙用何關新卷葉圓通自有倒聞機

夢中鼓響生千偈覺後春聲失百非寄語爵陰吞賊道玉牀安穩坐朱衣
東極空歌下始青西方寶網奏韶英不須路入兜元國自有音聞室後城
牛蟻誰知牀下鬪雞蠅任向夢中鳴如今却笑難隨種無耳何勞強聽聲
碧虛席上得趙養民運使寄詩約今晚可歸次韻答之

寒夜

萬象閒無語一蛩吟獨譁蕭蕭月浸樹滿庭穠李花風從月中來吹我兩
鬢華北斗聲迴環南斗亦橫斜人生幾良夜吾行久天涯離居隔江漢何
由寄疏麻

甲午除夜猶在桂林念致一弟使虜今夕當宿燕山會同館兄弟
南北萬里感悵成詩

把酒新年一笑非鵲鴿原上巧相違墨濃雲瘴我猶住席大雪花君未歸
萬里關山燈自照五更風雨夢如飛別離南北人誰免似此別離人亦稀
乙未元日用前韻書懷今年五十矣

浮生四十九俱非樓上行藏與願違縱有百年今過半別無三策但當歸
定中久已安心竟飽外何須食肉飛若使一丘并一壑還鄉曲調儘依稀

儘乃俗字

再用前韻

時被命帥蜀

休論今昨總皆非世味誠甘與我違蜀道雖如履平地杜鵑終勸不如歸
三冬自苦坐毛穎一夢微官陪蠶飛夜久南枝翻倦鵲茫茫月白衆星稀
與同僚遊栖霞洞極深遠中有數路相傳有通九疑者燭將盡乃
還飲碧虛上陳仲思用二華君韻賦詩即席和之

竹杖芒屨俗網踈每逢絕勝更踟躕但隨岐路東西去莫計光陰大小餘
彷彿桃源猶舞鳳辛勤李白謾騎魚今朝真作遊仙夢不似騷人賦子虛
施元光在崑山病中遠寄長句次韻荅之

四海飄蓬客舍邊幾多雲水與風煙絕無膂力驅長轡空有孤忠誓大川
參井忽隨征馬上斗牛應挂故山前親交情話知何許詩到天涯喜欲顛
次韻趙養民碧虛坐上

已將山色染眉黛更挽江波添酒壘珍重江山勸人醉笑人驅馬惺惺迴

贛州明府楊同年挽歌詞二首

拱璧溫無類深蘭遠自芳清班孤玉筍薄宦老銅章傳業麒麟子承家鴻
鴈行門闢自簪笏吾獨憾堂堂

憶昔龍門化曾容鴈塔陪逡巡九閨過迢遞一書來未報錯刀贈驚傳丹
旄迴辰陽隔江渚空步楚詞哀

石湖居士詩集卷十四

石湖居士詩集卷十五

初發桂林有出嶺之喜但病餘便覺登頓至靈川疲甚自歎羸軀
乃無一可偶陸融州有使來書此寄之

桂林獨宜人無瘴古所傳北客守炎官恃此以泰然堂高愜宴坐訟簡容
佳眠不計身落南瘴柄三回天今朝遂出嶺歡呼繫行纏且免脫豐草池
魚躍清淵那知多病身久靜翻懷安長風蕩籃輿簾箔飄以翔靈泉路喫
蹶僕夫告頰肩我亦頭岑岑中若磨蟻旋走投破驛宿強飯不下咽茲事
未渠央萬里蜀道難十年故倦遊况乃成華巔蠶老當作繭不繭夫何言

甘棠驛

萬里三年醉嶺梅東風刮地馬頭迴心勞政拙無遺愛慚向甘棠驛裏來

靈泉

驛後有龍惠泉

泉螭無語笑經過欲拊翠鰐奈拙何孤奉明恩雖出嶺歡顏終少汗顏多

嚴關

或謂之炎關桂人守險處朔雪多不入關關內外風氣迥殊人以爲南北之限也

回看瘴嶺已無憂尚有嚴關限北州裹飯長歌關外去車如飛電馬如流

施進之追路出嚴關且寫子真戲題其上

喚渡牂牁水濱嚴關關外又逢春神仙富貴俱何在且作全家出嶺人
興安乳洞有上中下三巖妙絕南州率同僚餞別者二十一人遊
之

山水敦夙好煙霞痼竒懷向聞乳洞勝出嶺更徘徊雪林縞萬李東風知
我來華裾繡高原故人紛後陪繫馬玉溪橋嵌根豁崔嵬蕩蕩碧瑤宮冰
泉漱牆隈芝田溉石液深畦龍所開句我一掬慳類此炎州埃仍呼輪袍
舞醉倒瑞露杯但恐驚山靈腰鼓轟春雷薪翁雜餉婦園視歡以咍茲巖
何時鑿閱世幾劫灰始有此客狂後會真悠哉南遊冠平生已去首猶回
歲月可無紀三洞俱磨崖會有好事者摩挲讀蒼苔

鐮背 在興安縣五里所秦史錄所作也迎海陽水壘石為壇前銳
如鐮衝水分南北下為湘灘二江功用竒偉余交代李德遠

嘗修之

導江自海陽至縣迺瀾迤狂瀾既奔傾中流遇鐮背分為兩道開南灘北
湘水至今舟楫利楚粵徑萬里人謀斂天造史祿所經始無謂秦無人虎

鼠用否耳紫藤纏老蒼白石溜清泚是聞可作社牲酒百世祀修廢者誰
歟配以臨川李

大通界首驛

愚悃無華敢自欺寸誠珍重吏民知東風重倚庭前樹送別人情似到時
陳仲思陳席珍李靜翁周直夫鄭夢授追路過大通相送至羅江
分袂留詩為別

相送不忍別更行一程路情知不可留猶勝輕別去二陳拱連璧僊李瑚
璉具周子雋拔俗鄭子秀風度嗟我與五君曩如栖鳥聚偶投一林宿飄
搖共風雨明發各飛散後會渺何處栖鳥固無情我輩豈漫與班荆一炊
頃聽此昆弟語把酒不能觴有淚若兒女脩程各著鞭慷慨中夜舞功名
在公等矐儒老農圃

懷桂林所思亭

簾山竒絕送歸時曾榜新亭號所思桂水祇今湘水外他年空有四愁詩
羅江

嶺北初程分外貪驚心猶自怯晴嵐如何花木湘江上也有黃茅似嶺南
初入湖湘懷南州諸官

今晨入湖南岡上絳以紫厥壤既殊異風氣當稱此回思始安城舊籍贅
楚尾實惟荊州隸零陵之南鄙時雪度嚴關物色號清美儻以土宜觀尚
非清相比何況引而南焦茅數千里向我作牧時客過不停軌憧憧走官
下既至輒咎悔書來無別語但說瘴鄉鬼我今幸北轅又念衆君子懷哉
千金軀博此五斗米作詩諷方來南遊可以已車輪倘無角吾詩亦金柅
清湘縣郊外雜花盛開有懷石湖

午行清湘縣妍煖春事嘉柴荆開桃李冥冥一川花故園豈少此愈此百
倍加我寧不念歸顧作失木鴉百年北窓涼安用天一涯君恩重喬嶽敢
計征路賒鄉心與官身鑿枘方聳牙橘柚走珍貢何如繫匏瓜明當復露
奏天日臨幽遐儻許清江使曳尾還汗邪

珠塘未至清湘
二十里

林茂鳥烏急坡長驢馱鳴坐輿猶足痺負笈想肩頰廢廟藤遮合危橋竹

織成路傍行役苦隨處有柴荆

題湘山大施堂

山中相師號無量
壽真身塔在焉

重倚春林淚竹枝南遊風物鬢成絲難尋桂海千峰夢更了湘山一段奇
來去別無心外法行藏休問塔中師若論大施門前事竿木逢場且賦詩
清湘驛送祝賀州南歸

海內交情兩斷金離歌倡和俱吳音桃花如雨暮春酒竹箭有筠他日心
萬里書來蜀道易四愁詩成湘水深田園將蕪各早計一棹五湖能見尋
清湘驛送王柳州南歸二絕

南歸北去路茫茫不是行人也斷腸可惜湘江春夜月落花時節照離觴
我已兼程無脚力君猶追路有襟期從今月下共花下誰復醉吟先和詩

七里店口占

分手暮江寒徘徊立馬看尋常相見易倍覺別離難

全守支耀卿飲餞七里倅楊仲宣復攜具至深溪酌別且乞余書
走筆作此兼寄耀卿

石湖詩集卷十五
三
店舍煙火寒塵沙亭堠遠媽紅糝芸綠春事亦已晚年芳去踈踈江水來
袞袞故人瀟相逢留落一笑莞已張七里飲更出深溪餞草間艷紅粉竹
裏趣廚傳故意如許長由來共鄉縣愧我不能觴負此離歌轉別愁滿天
末不醉何由遣却憶支使君風前白波捲

深溪鋪中二絕追路寄呈元將仲顯二使君

賀州歸去柳州還分路千山與萬山把酒故人都別盡今朝真箇出陽關
祇有南風捲路塵斷無南客送車輪故人合在瀟湘見却向瀟湘別故人

戲題愚溪

碧湍漱白石汙汙復湯湯既爲人所愚安用爾許忙我昔曾經過重來已
三霜無事趺雙足奔走寧非狂溪流到江平翻笑客路長豈不有歲晚乞
身還故鄉

初泛瀟湘

六槩齊飛急下灘碧琉璃上雪花翻越來溪色清如此只欠磯頭一釣竿
湘口夜泊南去零陵十里矣營水來自營道過零陵下湘水自桂

林之海陽至此與營會合爲一江

我從清湘發源來直送湘流入營水故人亭前合江處暮夜檣竿矗沙尾
却從湘口望湘南城郭山川恍難紀萬壑千巖詩不徧惟有蒼苔痕屐齒
三年瘴霧亦奇絕浮世登臨如此幾湖南山色夾江來無復瑤簍插天起
坡陀狼石蹲清漲澹蕩光風浮白芷騷人魂散若爲招傷心極目春千里
我亦江南轉蓬客白鳥愁煙思故壘遠遊雖好不如歸一聲鷓鴣花如洗

南臺瑞應閣用壁間張安國韻

衝雨上山頭臨雲看山脚松間一彈指開此寶樓閣草鞵方費錢拂子不
暇握小偈出雷音千古驚猿鶴

湘潭

暮雨檣竿縣一灣長官立馬水雲間風吹江沫浮浮去誰在沙頭閉戶閒
泊長沙楚秀亭

雨從湘西來波動南楚門不知春漲高但怪江水渾舟行風打頭陸行泥
沒鞍且登裴公臺半日心眼寬

題嶽麓道鄉臺

山外江水黃江外滿城綠城外杳無際天低到平陸長煙貫楚尾遠勢帶吳蜀故園東北望遊子闌干曲

寄題潭帥王樞使佚老堂

孺子滄浪濯纓處千載新堂來卜鄰潦收無波徹底靜東湖之水堂中人濛陽花譜勝洛下竹西藥闌來海瀕新篁綠沉桂丹渥嶽立竒石蒼苔皴賞心滿眼伴閉戶天風夜下扶車輪胸中種蠹妙經濟鬢鬚白雪朱顏春蒼生未佚身未老斯堂未可忘斯民四年西略可萬世孤撐獨立扛千鈞匹馬幡幡恃天日危言岌岌愁鬼神浮生蚤休信不惡持此欲去非吾聞客遊瀟湘逢騎吹知公已為蒼生起公今少勞佚者多湛輩乃可寒江蓑

王公自言堂去東湖頃步新得彭州牡丹揚州芍藥丹桂貓頭竹并徐氏五怪石列堂下

湘陰橋口市別游子明

馬首欲東舟欲西洞庭橋口暮寒時三年再別子輕去萬里獨行吾蚤衰遙憶美人湘水夢側身西望劔門詩老來不灑離亭淚今日天涯老淚垂

竈渚

白魚出水卧銀刀紫筍堆盤脫錦袍捫腹將軍猶未快棹船西岸摘萋蒿

大波林

湖路荒寒又險艱大千空水我居間篙師晚始分南北指點青青漢口山連日風作洞庭不可渡出赤沙湖

金沙堆前風未平赤沙湖邊波不驚客行但逐安穩去三十六灣漲痕生滄洲寒食春亦到荻芽深碧萋芽青汨羅水飽動荆渚嶽麓雨來昏洞庭大荒無依飛鳥絕天地惟有孤舟行慷慨悲歌續楚些彷彿幽瑟迎湘靈黃昏慘淡機極浦雖有漁舍無人聲冬湖落濡此暫住春潦怒長隨傭耕吾生一葉寄萬木況復搖落浮滄溟漁蠻尚自有常處羈官方汝尤飄零

寄題贛江亭

陳季陵贛州書云新作此亭泉使李正之題其榜要予詩

二水之會新作亭主人文章子墨卿我記斯亭且不朽千載當與文俱鳴題榜誰歟漢使者風流好事飾儒雅平生兩君吾故人安得繫馬亭堦下鼓旗西征上奔瀧想思不見心難降瞿塘縱有文鱗雙愛莫致之章貢江

江流去不定山石來無窮步步有勝處水清石玲瓏安得扁舟繫絕壁卧聽漁童吹短笛弄水看山到月明過盡行人不相識

夜泊灣舟大風雨未至衡州一百二十里

阿香攪客眠夜半驅疾雷空水受奇響如從船底來嘈嘈雨窓鬧軋軋風柁開睡魔走辟易耳界愁喧逐有頃飄驟過灘聲獨鳴哀燈婢燭囊衣篙師理檣桅煩擾到明發村雞亦喈喈

泊衡州

客裏仍哦對雨吟夜來星月曉還陰空江十日無春事船到衡陽柳色深

步入衡山

應有人家住隔溪綠陰亭午但聞雞松根當路龍筋瘦竹筍漫山鳳尾齊墨染深雲猶似瘴絲來小雨不成泥更無騎吹喧相逐散誕閒身信馬蹄

重遊南嶽

焚香鎮南殿過銓德觀醮注生祠庭觀道君玉符王七及八角玉印經方四寸許文曰注生真君玉印雨中登山遊南臺福巖至瑞應擲鉢天柱諸峰之上寒甚病衰不至上封而返

捨舟得馬如馭氣步入青松三十里我從蠻嶺瘴煙來不怕雨雲埋嶽趾憶昔南征欵廟庭往來無恙神所社當時已有歸田願帝臨此心如白水煌煌南正館於東手握八觚温玉璽駿奔瀟霍左右輔好生不殺扶炎紀崇禋竣事曉壇空躋攀小試青鞋底不知雲磴幾千丈但見漫山白龍尾石頭招我上南臺瑞應闌干天半倚福巖鐘聲過橋來彷彿三生如夢裏堂中尊者已先去苔鎖巖扉何日啓竹嫌磽确老逾瘦松畏高寒蟠不起癯儒尚病怕深登幽討未窮行且止我評七十二高峰鬱律穹窿少觀美儼然可瞻不可玩往往雄爭如負辰乃知嶽鎮蓋深厚不與他山爭秀偉區區獻狀眩兒童乳洞淡巖真戲耳

四明人董嶧久居嶽市乞詩

祝融峰下兩逢春雨宿風餐老病身莫笑五湖萍梗客海邊亦有未歸人

三月十五日華容湖尾看月出

雲銷澧陽風月生岳陽水誰推赤金盤湧出白銀地徘徊忽騰上蹠蹠恐顛墜稍高輪漸安飛彩到蓬背晶浪皆舞靨靨星欲避兜羅世界網普現無

邊際官居東戶庭有眼如幻翳向非行大荒寧有此巨麗乘除較得失漂泊
非左計妻孥競驩譁渠亦知許事

釣池口阻風迷失港道

回風打船失西東柁癡擄弱無適從三老號呼鐵纜墜招頭搥鼓驅魚龍千
篙撐折百丈斷日暮稍與洪相通推移尋尺力千里時有黃帽來言功康莊
大遠世不乏乃獨蹇產濤波中一官橫起險易相剎那憂喜隨兒童漲湖連
天遠目斷且復加飯追萍蓬蒲團坐煖看香篆作止任滅如頑空

鼎河口枕上作

漂泊離巢燕彎跼負殼蝸瘦嫌莞席硬老覺畫屏奢報道帆當落傳呼鼓已
搥且投入處宿未到已聞墓

安鄉縣西晚泊

水闊鳥鳥倦墟寒童僕飢一灣村縣過百折暮江遲曉夢孤燈見春陰病骨
知簡書寧不畏旅力奈先疲

澧陽江

順流下沅江湖流上澧浦水深蘭芷寒漂搖憚風雨采采不盈掬何由寄
遠渚洞庭浮天白遐矚莽吳楚有懷獨晤歎擄聲與人語暮夜即維舟蒼
茫定何許

澧浦

葦岸齊齊似碧城江船罨岸逆風行綠蘋白芷俱憔悴惟有萋萋滿意生

澧江漁舍

安鄉澧陽之間自兵
火後瘡殘猶未復

狡窟空來四十年沿江猶自少炊煙茫茫曠土無人問蘆荻春深綠滿川

孫黃渡

自此登陸至公
安渡江過沙頭

捨舟從陸更間關徑仄仍荒亦未乾棘刺近人牢閉眼泥塗兀馬緊扶鞍
茶山盜藪路程惡麥壠人家懷抱寬擔僕輿夫盡劬瘁病翁那得更加餐

潺陵

舟橫攸河水馬滑潺陵道百里無鉏犁閒田生春草春草亦已瘦栖栖晚
花少落日見行人愁煙沒孤鳥老翁雪髯鬢生長識羣盜歸來四十年墟
里迹如埽莫訝土毛稀須知人力槁生聚何當復茲事恐終老人言古戰

石湖詩集卷十五
七
場瘡痍猝難療誰使至此極天平吾請禱

將至公安

地闊天低淚如雨我馬虺隤我僕痛豈不懷歸畏簡書前村後村啼杜宇
伴人憂煎與人語雲寒日薄春一夢公安縣前酒可沽不如且聽提胡盧

公安渡江

食罷雨方作起行泥已深伴愁多楚些吟病獨吳音莫怨馬蹄滑須愁蠶
事侵梅黃時節是未可決晴陰

荆渚堤上

原田何萋萋野水亂平楚大堤少人行誰與藝稷黍獨木且百歲翫麟立
水滸當年識兵燼見赦幾樵斧摩挲欲問訊恨汝不能語薄暮有底忙沙
頭聽鳴榔

渚宮野步題芳草

草色沐新雨綠潤如得意披拂欲生煙萋萋著巾袂天涯各芳春秦吳千
萬里故人攀桂枝今夕念游子

發荊州

自此登舟
至夷陵

初上蓬籠竹笮船始知身是劔南官沙頭沽酒市樓煖徑步買薪江墅寒
自古秦吳稱絕國于今歸峽有名灘千山萬水垂垂老只欠天西蜀道難

虎牙灘

又名金門十
二倍屬夷陵

傾崖溜雨色慘淡水墨畫平夷碎花縣槐木老藤挂翠莽楚甸窮黃流蜀
江下一灘今始嘗三峽此其亞雨點鼓士摻雲騰挽夫跨驚心度石林破
眼見村舍牛眠草色裏犬吠竹林罅步頭可檣船安穩睡殘夜

峽州至喜亭

斷崖卧水口連岡抱城樓下有吳蜀客檣竿立滄洲雨後漲江急黃濁如
潮溝時見出峽船鑊鼓噪中流通從稠灘來白狗連黃牛渦潰大如屋九
死爭船頭人鮪尚脫免虎牙不須憂

初入峽山效孟東野

自此登陸
至秭歸

峽山偪而峻峽泉湍以碛峽草如毳毛峽樹多樛枝峽禽惟杜鵑血吻日夜
啼峽馬類黃狗不能長鳴嘶峽曉虎跡多峽暮人跡稀峽路如登天猿鶴不

石湖言集卷十五
敢梯僕夫負嶮哭我亦呻吟悲悲吟不成章聊賡峽哀詩

土門

汗泥汨峻阪狼石卧中路睥睨無敢前趨起屢却顧長繩引籃輿前輓後推
去吏士更叫號作氣欲飛度顛墜較分寸商略營頭步須臾氣亦竭一一汗
如雨

桃花舖

老蕨漫山鳳尾張青楓直幹如攢槍山深嵐重鼻酸楚石惡淖深神慘傷陰
崖風生吹客急草中枯株似人立映晡卓幕先下程將士黃昏始相及

覆盆嶺

三登三降岡始斷一步一休日欲斜濁酒半瓶不得煖覆盆有舖無幾家

小望州

峰頭高絕鄰四瞰若窺井小山萬蟻垤大山拊其頂叢霄一握近罡風振衣
冷似聞天人語笑我雪垂領曩侍玉案香委佩太清境獨下赤城戲俯仰一
枰頃豈其厭晨華嗅此腥腐鼎揮手謝天人伶俜愧孤影來償繭足債尚欠

界天嶺老矣且勸遊歸期行可請

大望州

望州山頭天四低東瞰夷陵西秭歸峽江微茫細如帶江外千峰青打圍黃
牛廟磯石如劈想看驚湍虎鬚白水行陸走俱險艱安得如鳥有羽翼

一百八盤

疇昔辭桂林自謂已出嶺蛻蟬蠻煙中恍若醉夢醒今來峽山路步步躡雲
頂仍聞蚯蚓瘴顧與嶠南等平生行路難驚浪兀漂梗迷塗茲益遠鳥道非
人境老矣法當佚懷哉跡可屏拜手天東南亟上歸田請

火墨坡下嶺

清晨入岑蔚嵐重寒颼颼忽聞黃鸝語方悟夢始秋旅食法當瘦遠行人所
愁况復深山中不與和氣游苦辛那敢憚病悴良可憂徒憂亦無益聊作商
聲謳

八場平聞猿

清猿泠泠鳴玉簫三聲兩聲高樹梢子母聯拳傳杖去忽作哀厲長鳴號天

寒林深山石惡行人舉頭雙淚閣雪澗琴心未足悲須寫峽中腸斷時

鑽天三里

非岡非嶺復非坡黃鵠不度吾經過妻孥下行啼且笑聯手相攜如踏歌風吹汗乾人力盡履齒與石方相磨鑽天三里似千里四十八盤將奈何

蛇倒退

山前壁如削山後崖復斷羣吾達隴首如海到彼岸那知下嶺處慄甚履冰戰牽前帶相挽縋後衣盡綻健倒輒尋丈徐行屨分寸上疑綠竹竿下劇滾金彈豈惟蛇退舍飛鳥望崖反稍喜一徑平猶有千石亂仍逢新燒畬約略似耕畔心知人境近輦末百憂散山民茆數把鬼質犢子健腰鑿走迎客再拜復三歎謂匪人所蹊官來定何幹儻爲飢火驅平地豈無飯意者官事迫如馬就羈絆我乃不能荅付以一笑粲

大丫隘

峽行五程無聚落馬頭今日逢耕鑿麥苗踈瘦豆苗稀椒葉尖新柘葉薄家家婦女布纏頭背負小兒領垂瘤山深生理却不乏人有銀釵一雙插終



